

Uunga siunnersuut:

Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allangortinneqarnerat pillugu Inatsisartut inatsisaat

(Inunnut nungullarsimasunut utoqqalinersiaqalernissamut ukiorititat 65-it, aaqqiinermi tunngaviusumik allannguineq)

§ 1

Utoqqalinersiaqarneq pillugu Inatsisartut inatsisaanni nr. 20, 23. november 2015-imeersumi, Inatsisartut inatsisaatigut nr. 24, 7. december 2015-imeersukkut, Inatsisartut inatsisaatigut nr. 6, 2. juni 2017-imeersukkut aamma Inatsisartut inatsisaatigut nr. 35, 28. november 2019-imeersukkut allangortinneqartumi tullinnguuttut allangortinneqarput:

1. § 1 imatut oqaasertalerneqarpoq:

” § 1. Utoqqalinersiaqalernissamut ukiorititat 67-iupput, taamaattorli imm. 2 takuuk.

Imm. 2. Qinnuteqartoqarneratigut inunnut, minnerpaamik ukiuni 35-ini timikkut tarnikkulluunniit oqimaatsumik suliaqarnermikkut nungullarsimasunut utoqqalinersiaqarnissamut ukiorititat 65-iussasut kommunalbestyrelsip aalajangersinnaavaa.

Imm. 3. Imm. 2 malillugu utoqqalinersiaqartitsinissamut malittarisassat erseqqinnerusut Naalakkersuisut aalajangersarsinnaavaat.”

2. § 11, *imm. 1* imatut oqaasertalerneqarpoq:

”Procenti aaqqiissutissaq Kalaallit Nunaanni Naatsorsueqqissaartarfiup naatsorsugaa tunngavigalugu §§ 9-10-mi taaneqartut aningaasat annertussusaat aaqqinneqassapput. Toqqammaviusumik aningaasartat aamma utoqqalinersianut tapit qaammatini aqqaneq-marlunni kingullerni procentimut aaqqiissutissamut allannguutissatut naatsorsorneqartoq 1. julimeersoq tunngavigalugu aaqqiivigineqassapput. Ukiumut ataasiarluni 1. januar aallarnerfigalugu atuuttussatut aaqqiisoqartassaaq.”

§ 2

Siusinaartumik pensionisiat pillugit Inatsisartut inatsisaanni nr. 40, 9. december 2015-imeersumi, Inatsisartut inatsisaatigut nr. 19, 28. november 2016-imeersukkut, Inatsisartut inatsisaatigut nr. 40, 23. november 2017-imeersukkut, Inatsisartut inatsisaatigut nr. 6, 27. november 2018-imeersukkut, Inatsisartut inatsisaatigut nr. 28, 28. november 2019-imeersukkut aamma Inatsisartut inatsisaatigut nr. 6, 19. november 2020-meersukkut allangortinneqartumi tullinnguuttut allangortinneqarput:

3. § 18, imm. 1 imatut oqaasertalerneqarpoq:

"Procenti aaqqiissutissaq Kalaallit Nunaanni Naatsorsueqqissaartarfiup naatsorsugaa tunngavigalugu § 17, imm. 2 malillugu siusinaartumik pensionisiat amerlassusissaat aaqqiivigineqartassapput. Siusinaartumik pensionisiat qaammatini aqqaneq-marlunni kingullerni procentimut aaqqiissutissamut allannguutissatut naatsorsorneqartoq 1. julimeersoq tunngavigalugu aaqqiivigineqartassapput. Ukiumut ataasiarluni 1. januar aallernerfigalugu atuuttussatut aaqqiisoqartassaaq."

§ 3

Inatsisartut inatsisaat manna inatsisartut inatsisaata saqqummiunneqarnerata aqaguani atuutilissaaq, aamma 1. januar 2021-miit atuutilissalluni.

Imm. 2. Naak § 1, nr. 1 malillugu utoqqalinersiaqartinneqarnissamut ukiorititanut piunasaqaatinik naammassinnaannikkaluarlutik, inuit utoqqalinersiaqartinneqarnissamik aalajangiiffigineqareersut utoqqalinersiaqarsinnaatitaanertik annaassanngilaat.

Kalaallit Nunaanni Namminersorlutik Oqartussat, ulloq xx.xxx. 2021

Múte Borup Egede